

經文：Mark 10:13-16

長執會 tī 2005 年通過一 ê 議案就是 tī 今年開始 hō 囡仔 kap 咱同齊做禮拜。希望 hō 囡仔 tī 喜樂中享受做禮拜 ê 氣氛，kap 大人同齊敬拜上帝，學習禮拜 ê 意義。主日學 chit-ê 構想真好，所以長執會全力配合，mà ñg 望全教會 lóng 來配合。囡仔 tī 禮拜中 ê 角色是「參與」，所以咱 hō 囡仔負責獻詩，讚美上帝，in mà 有家己 ê 週報。因為猶太社會歧視婦女 kap 囡仔，馬可 tī 今 á 日 ê 經文特別指出：耶穌無像祂 ê 學生排斥囡仔，伊接納囡仔，抱 in，並為 in 祝福。囡仔並無 kā 家己看作重要，in tī 大漢了後 chiah 慢慢踏入競爭 ê 世界。耶穌又講：人 ài 反轉親像囡仔 ê 心思一般，單純相信，完全領受上帝 ê 愛，天國就是為 án-ne ê 人所備辦 (太 18:3)。基督徒 beh 進入上帝國，siōng 難對付 ê 可能是咱固執 koh 保守 ê 心態，所以耶穌講：設使咱要進入天國，就 ài 學習囡仔 ê 卑微軟弱 kap 保持活潑 ê 心境，親像 óa 靠父母一樣完全 óa 靠上帝。現在咱來看囡仔 iáu 有啥物款 ê 特色是耶穌 ài 咱去學習 ê？

小漢囡仔 ê 口頭話是我不 kap 你好 ah，M-k oh 一目眨 ah 就 bē 記 ah。囡仔 m-nā 單純又坦白，有啥物話就講啥物 bē 隱瞞。有一個故事講：一工王先生來拜訪李先生，tú 好是中晝食飯時間，李太太叫囡仔去伊老父耳朵邊小聲講：中晝 mài 留阿叔食飯，咱厝內無菜 thang 招待伊。囡仔走去老父耳朵邊小聲講話。總是老父聽無，就對伊講：阿叔姆是外人講大聲一點無關係。囡仔大聲講：媽媽講厝內無菜，爸爸中晝 mài 留阿叔食飯。Koh 來，囡仔有旺盛 ê 求知慾，知影家己不 bàt，凡事向大人學習。Chiah-ê lóng 是反轉咱 ài 向囡仔學習 ê。

咱 ài 向囡仔學習，mà ài 把握機會，tī in iáu 小漢 ê 時 chūn，培養 in 愛讀上帝 ê 話；kap 疼上帝 ê 情感。咱 thang tui 兩方面來進行，第一是家庭方面，父母要負起責任，tui 日常生活中，教示囡仔祈禱（尤其是感恩 kap 代禱）、吟詩、背聖經節、主禱文等等。阮老父是長老會牧師，雖 bóng 教會無閒，無濟濟時間陪伴家己 ê 囡仔，總是伊對阮信仰 ê 培養，建立健康 ê 自我形象，尤其是建立對上帝 ê 信心非常重視。我小漢時 chūn 老母教我食飯要感謝，睷 ê 時 mà 要對一工所發生 ê 事感恩。我會記得 iáu 無讀冊阮老母就教我羅馬拼音，所以我真小漢就會曉讀白話字聖經，這是定根我 ê 信仰基礎。又來，阮父母 in 踏實、犧牲、勞苦，打拼作上帝的工，hō 我一直過 tiòh 凡事感恩 ê 生活。我感覺基督徒 siōng súi ê 所在就是：無論環境好歹 lóng 愛感恩，心存感恩來面對人生。續落來 tī 教會 ê 環境中長大，mà 是一種身教。藉 tiòh 主日 ê 教示，hō 囡仔 tui 小漢參加聖歌隊、奉獻 kap 各種 ê 事奉，或是聚會、聚餐 ê 參與，lóng ē-tàng hō 囡仔佇聖徒相通 ê 氣氛中來生長。按呢 tī 疼 ê 團契內底幫助 chit 群小羊，一生行 tī 正直 ê 路上。

囡仔 ê 可塑性高，尤其 tī 三歲 chin 前，日本 ê 鈴木音樂教學法就是用 chit 種原理。

台灣 mà 有三歲決定一生 ê 書，現代 ê 父母濟濟 lóng 用 chit 種理念來教育囡仔。我真歡喜咱 ê 兒童主日學教育者投入濟濟 ê 心神來教育 in，囡仔是教會 ê 未來，教會對 in 有責任以真理來教示 in，hō in ē-tàng 照上帝 ê 心意來生長，將來用信心接受基督 ê 救贖，一生服事伊。這是咱對主日學 ê 異象，所以當長執會 tī 討論 ê 時 chūn，校長一直強調囡仔吵鬧是 ê thang 理解 ê，總是咱 ài hō in 來親近耶穌。猶太人亡國兩千外冬了後猶原 ē-tàng 復國。諾貝爾獎 ê 得主有 25% 是猶太人，chit 種偉大 ê 成就，大部份 ê 評論家 lóng 講是 in 猶太人 ē-tàng 執守對上帝 ê 信仰傳統。這 hō 我想起另外一 ê 現象就是隱藏 ê 基督徒。tùi 日本德川政府禁止基督教了後，到明治維新之間大約有 200 年，chiah-ê 基督徒就隱藏 tī 家己厝內禮拜一直傳到今 á 日，可見宗教教育 ê 重要。

教會是上帝 ê 家庭，舊約就是以色列子孫 ê 家族歷史。一 ê 嬰仔出世 ē-tàng 帶 hō 家庭歡樂 kap ñg 望，咱 ê 教會有將近 18% ê 幼兒，雖然咱有心 kā 囡仔帶來耶穌面前，M-k oh 有時陣咱 ê 心情親像學生全款，認為囡仔 bàt 啥物？去邊 á sng，mà 來攪擾咱禮拜，總是教會應該是一個無世代界線 ê 所在：tī chia 嬰仔 thang 安穩睡 tī 母親 ê 胸坎；囡仔有 tang 時坐無 tiâu，有 tang 時 á 發出輕輕 á 笑聲。耶穌 kā 咱講教會拆開人 ê 隔離，透過各樣 ê 背景、bô 同年歲 ê 人互相學習，互相激勵，án-ne chiah 是一間有生命、有氣力 tī 基督裡 ê 教會。ñg 望咱每一 ê 人 lóng ē-tàng 保持囡仔一樣單純謙卑 ê 心性，tī 世人面前，活出一個無全款 ê 生命。